

官常典

官常典第一百五十六卷

勳爵部彙考二十八

周十四 秦二

匡王二年秋秦人楚人巴人滅庸 按春秋文公十六年 按左傳十六年秋庸人率羣蠻以叛楚
楚子伐庸秦人巴人從楚師羣蠻從楚子盟遂滅庸

匡王六年春二月秦師伐晉 按春秋宣公二年 按左傳元年夏晉欲求成於秦趙穿曰我侵崇
秦急崇必救之吾以求成焉冬趙穿侵崇秦弗與成二年春秦師伐晉以報崇也遂圍焦夏晉趙盾
救焦遂自陰地及諸侯之師侵鄭以報大棘之役楚鬬椒救鄭曰能欲諸侯而惡其難乎遂次於鄭
以待晉師趙盾曰彼宗競於楚殆將斃矣姑益其疾乃去之

定王三年春秦伯稻薨子桓公立 按春秋宣公四年

定王六年夏六月晉師白狄伐秦 按春秋宣公八年 按左傳八年春白狄及晉平夏會晉伐秦

晉人獲秦諜殺諸絳市六日而蘇

定王十三年秋秦人伐晉 按春秋宣公十五年 按左傳十五年秋七月秦桓公伐晉次於輔氏
壬午晉侯治兵於稷以略狄土立黎侯而還及雒魏顆敗秦師於輔氏獲杜回秦之力人也初魏武
子有嬖妾無子武子疾命顆曰必嫁是疾病則曰必以爲殉及卒顆嫁之曰疾病則亂吾從其治也
及輔氏之役顆見老人結草以亢杜回杜回躡而顛故獲之夜夢之曰余而所嫁婦人之父也爾用
先人之治命余是以報

定王十八年冬十一月丙申魯侯及楚人秦人宋人陳人衛人鄭人齊人曹人邾人薛人鄆人盟于
蜀 按春秋成公二年 按左傳二年冬楚師侵衛遂侵我師于蜀使臧孫往辭楚侵及陽橋孟孫
請往賂之以執斲執鍼織紵皆百人公衡爲質楚人許平十一月公及楚公子嬰齊蔡侯許男秦右
大夫說宋華元陳公孫寧衛孫良夫鄭公子去疾及齊國之大夫盟于蜀

簡王四年冬十一月秦人白狄伐晉 按春秋成公九年 按左傳九年冬十一月秦人白狄伐晉
諸侯貳故也

簡王六年冬秦晉盟于河西 按春秋不書 按左傳成公十一年冬秦晉爲成將會于令狐晉侯

先至焉秦伯不肯涉河次于王城使史顓盟晉侯于河東晉卻犇盟秦伯于河西范文子曰是盟也何益齊盟所以質信也會所信之始也始之不從其可質乎秦伯歸而背晉成

簡王八年夏五月晉侯齊侯宋公魯侯衛侯鄭伯曹伯邾人滕人伐秦 按春秋成公十三年

按左傳十三年春三月公及諸侯朝王遂從劉康公成肅公會晉侯伐秦夏四月戊午晉侯使呂相絕秦曰昔逮我獻公及穆公相好戮力同心申之以盟誓重之以昏姻天禍晉國文公如齊惠公如秦無祿獻公卽世穆公不忘舊德俾我惠公用能奉祀于晉又不能成大勳而爲韓之師亦悔于厥心用集我文公是穆之成也文公躬擐甲冑跋履山川踰越險阻征東之諸侯虞夏商周之裔而朝諸秦則亦旣報舊德矣鄭人怒君之疆場我文公帥諸侯及秦圍鄭秦大夫不詢于我寡君擅及鄭盟諸侯疾之將致命于秦文公恐懼綏靜諸侯秦師克還無害則是我有大造于西也無祿文公卽世穆爲不弔蔑死我君寡我襄公送我殺地好絕我好伐我保城殄滅我費滑散離我兄弟撓亂我同盟傾覆我國家我襄公未忘君之舊勳而懼社稷之隕是以有殺之師猶願赦罪于穆公穆公弗聽而卽楚謀我天誘其衷成王隕命穆公是以不克逞志于我穆襄卽世康靈卽位康公我之自出

又欲闕翦我公室傾覆我社稷帥我螫賊以來蕩搖我邊疆我是以有令狐之役康猶不悛入我河曲伐我涑川俘我王官翦我羈馬我是以有河曲之戰東道之不通則是康公絕我好也及君之嗣也我君景公引領西望曰庶撫我乎君亦不惠稱盟利吾有狄難入我河縣焚我箕郛芟夷我農功虔劉我邊陲我是以有輔氏之聚君亦悔禍之延而欲徼福于先君獻穆使伯車來命我景公曰吾與女同好棄惡復修舊德以追念前勲言誓未就景公卽世我寡君是以有令狐之會君又不祥背弃盟誓白狄及君同州君之仇讎而我之昏姻也君來賜命曰吾與女伐狄寡君不敢顧昏姻畏君之威而受命于吏君有二心於狄曰晉將伐女狄應且憎是用告我楚人惡君之二三其德也亦來告我曰秦背令狐之盟而來求盟于我昭告昊天上帝秦三公楚三王曰余雖與晉出入余唯利是視不穀惡其無成德是用宣之以懲不壹諸侯備聞此言斯是用痛心疾首矐就寡人寡人帥以聽命唯好是求君若惠顧諸侯矜寡寡人而賜之盟則寡人之願也其承寧諸侯以退豈敢徼亂君若不施大惠寡人不佞其不能以諸侯退矣敢盡布之執事俾執事實圖利之秦桓公旣與晉厲公爲令狐之盟而又召狄與楚欲道以伐晉諸侯是以睦於晉晉欒書將中軍荀庚佐之士燮將上軍卻

錡佐之韓厥將下軍荀營佐之趙旃將新軍卻至佐之卻縠御戎欒鍼爲右孟獻子曰晉帥乘和師必有大功五月丁亥晉師以諸侯之師及秦師戰于麻隧秦師敗績獲秦成差及不更女父曹宣公卒于師師遂濟涇及侯麗而還迓晉侯于新楚

簡王九年冬秦伯薨子景公嗣 按春秋成公十四年

靈王八年夏秦人侵晉 按春秋不書 按左傳襄公九年夏秦景公使士雅乞師於楚將以伐晉楚子許之子囊曰不可當今吾不能與晉爭晉君類能而使之舉不失選官不易方其卿讓於善其大夫不失守其士競於教其庶人力於農穡商工阜隸不知遷業韓厥老矣知營稟焉以爲政范匄少於中行偃而上之使佐中軍韓起少於欒黶而欒黶士魴上之使佐上軍魏絳多功以趙武爲賢而爲之佐君明臣忠上讓下競當是時也晉不可敵事之而後可君其圖之王曰吾旣許之矣雖不及晉必將出師秋楚子師于武城以爲秦援秦人侵晉晉饑弗能報也

靈王十年冬秦人伐晉 按春秋襄公十一年 按左傳十一年夏四月諸侯伐鄭鄭人行成秋七月同盟于亳楚子囊乞旅於秦秦右大夫詹帥師從楚子將以伐鄭鄭伯逆之丙子伐宋九月諸侯

悉師以復伐鄭冬十二月秦庶長鮑庶長武帥師伐晉以救鄭鮑先入晉地士魴禦之少秦師而弗設備壬午武濟自輔氏與鮑交伐晉師己丑秦晉戰于櫟晉師敗績易秦故也

靈王十一年冬秦嬴歸于楚 按春秋不書 按左傳襄公十二年冬秦嬴歸于楚楚司馬子庚聘于秦爲夫人寧禮也

靈王十三年夏四月晉荀偃魯叔孫豹齊崔杼宋華閱仲江衛北宮括鄭公孫董曹人莒人邾人滕人薛人杞人小邾人伐秦 按春秋襄公十四年 按左傳十四年夏諸侯之大夫從晉侯伐秦以

報櫟之役也晉侯待於竟使六卿帥諸侯之師以進及涇不濟叔向見叔孫穆子穆子賦匏有苦葉叔向退而具舟魯人莒人先濟鄭子蟠見衛北宮懿子曰與人而不固取惡莫甚焉若社稷何懿子說二子見諸侯之師而勸之濟濟涇而次秦人毒涇上流師人多死鄭司馬子蟠帥鄭師以進師皆從之至於櫟林不獲成焉荀偃令曰鷄鳴而駕塞井夷竈唯余馬首是瞻欒黶曰晉國之命未是有也余馬首欲東乃歸下軍從之左史謂魏莊子曰不待中行伯乎莊子曰夫子命從帥欒伯吾帥也吾將從之從帥所以待夫子也伯游曰吾令實過悔之何及多遺秦禽乃命大還晉人謂之遷延之

役欒鍼曰此役也報欒之敗也役又無功晉之恥也吾有二位於戎路敢不恥乎與士鞅馳秦師死焉士鞅反欒黶謂士句曰余弟不欲往而子召之余弟死而子來是而子殺余之弟也弗逐余亦將殺之士鞅奔秦於是齊崔杼宋華閱仲江會伐秦不書情也向之會亦如之衛北宮括不書於向書於伐秦攝也秦伯問於士鞅曰晉大夫其誰先亡對曰其欒氏乎秦伯曰以其汰乎對曰然欒黶汰虐已甚猶可以免其在盈乎秦伯曰何故對曰武子之德在民如周人之思召公焉愛其甘棠況其子乎欒黶死盈之善未能及人武子所施沒矣而黶之怨實章將於是乎在秦伯以爲知言爲之請於晉而復之

靈王二十五年春秦伯之弟鍼如晉修成夏楚子秦人侵吳 按春秋不書 按左傳會于夷儀之歲齊人城邾其五月秦晉爲成晉韓起如秦涖盟秦伯車如晉涖盟成而不結二十六年春秦伯之弟鍼如晉修成叔向命召行人子員行人子朱曰朱也當御三云叔向不應子朱怒曰班爵同何以黜朱於朝撫劍從之叔向曰秦晉不和久矣今日之事幸而集晉國賴之不集三軍暴骨子員道二國之言無私子常易之姦以事君者吾所能御也拂衣從之人救之平公曰晉其庶乎吾臣之所爭

者大師曠曰公室懼卑臣不心競而力爭不務德而爭善私欲已侈能無卑乎夏楚子秦人侵吳及
雩婁聞吳有備而還遂侵鄭五月至於城麋鄭皇頡戍之出與楚師戰敗穿封戍囚皇頡公子圍與
之爭之正於伯州犁伯州犁曰請問於囚乃立囚伯州犁曰所爭君子也其何不知上其手曰夫子
爲王子圍寡君之貴介弟也下其手曰此子爲穿封戍方城外之縣尹也誰獲子囚曰頡遇王子弱
焉戍怒抽戈逐王子圍弗及楚人以皇頡歸印董父與皇頡戍城麋楚人囚之以獻於秦鄭人取貨
於印氏以請之子大叔爲令正以爲請子產曰不獲受楚之功而取貨於鄭不可謂國秦不其然若
曰拜君之勤鄭國微君之惠楚師其猶在敝邑之城下其可弗從遂行秦人不予更幣從子產而後
獲之

景王四年夏秦伯之弟鍼出奔晉

按春秋昭公元年

按左傳元年夏五月秦后子有寵於桓如

二君於景其母曰弗去懼選癸卯鍼適晉其車千乘后子享晉侯造舟于河十里舍車自雍及絳歸
取酬幣終事八反司馬侯問焉曰子之車盡於此而已乎對曰此之謂多矣若能少此吾何以得見
女叔齊以告公且曰秦公子必歸臣聞君子能知其過必有令圖令圖天所贊也后子見趙孟趙孟

曰吾子其曷歸對曰鍼懼選於寡君是以此將待嗣君趙孟曰秦君何如對曰無道趙孟曰亡乎對曰何爲一世無道國未艾也國於天地有與立焉不數世淫弗能斃也趙孟曰天乎對曰有焉趙孟曰其幾何對曰鍼聞之國無道而年穀和熟天贊之也鮮不五稔趙孟視蔭曰朝夕不相及誰能待五后子出而告人曰趙孟將死矣主民翫歲而愒日其與幾何秋楚公子圍使公子黑肱伯州犂城犖櫟邲鄭人懼子產曰不害令尹將行大事而先除二子也禍不及鄭何患焉冬楚公子圍將聘于鄭伍舉爲介未出竟聞王有疾而還伍舉遂聘十一月己酉公子圍至入問王疾縊而弑之遂殺其二子幕及平夏右尹子干出奔晉宮廐尹子皙出奔鄭殺太宰伯州犂於邲葬王於邲謂之邲敖使赴於鄭伍舉問應爲後之辭焉對曰寡大夫圍伍舉更之曰共王之子圍爲長子干奔晉從車五乘叔向使與秦公子同食皆百人之餼趙文子曰秦公子富叔向曰底祿以德德鈞以年年同以尊公子以國不聞以富且夫以干乘去其國彊禦已甚詩曰不侮鰥寡不畏彊禦秦楚匹也使后子與子干齒辭曰鍼懼選楚公子不獲是以皆來亦唯命且臣與羈齒無乃不可乎史佚有言曰非羈何

忌

景王八年秋秦伯薨子哀公立 按春秋昭公五年 按左傳五年冬秦后子復歸于秦景公卒故也

景王九年春葬秦景公 按春秋昭公六年 按左傳六年春大夫如秦葬景公禮也

敬王十四年冬楚甲包胥請師于秦 按春秋不書 按左傳定公四年冬蔡侯吳子唐侯伐楚大敗之吳從楚師及清發五戰及郢楚子取其妹界我以出涉雎吳入郢楚子涉江入于雲中鬬辛與其弟巢以王奔隨初伍員與申包胥友其亡也謂申包胥曰我必復楚國申包胥曰勉之子能復之我必能興之及昭王在隨申包胥如秦乞師曰吳爲封豕長蛇以荐食上國虐始於楚寡君失守社稷越在草莽使下臣告急曰夷德無厭若鄰於君疆場之患也逮吳之未定君其取分焉若楚之遂亡君之土也若以君靈撫之世以事君秦伯使辭焉曰寡人聞命矣子姑就館將圖而告對曰寡君越在草莽未獲所伏下臣何敢卽安立依於庭牆而哭日夜不絕聲勺飲不入口七日秦哀公爲之賦無衣九頓首而坐秦師乃出

敬王十五年夏六月申包胥以秦師救楚 按春秋不書 按左傳定公五年夏六月申包胥以秦

師至秦子蒲子虎帥車五百乘以救楚子蒲曰吾未知吳道使楚人先與吳人戰而自稷會之大敗夫槩王於沂吳人獲遽射於柏舉其子帥奔徒以從子西敗吳師於軍祥秋七月子期子蒲滅唐九月夫槩王歸自立也以與王戰而敗奔楚爲堂谿氏吳師敗楚師於雍澨秦師又敗吳師吳師居麇子期將焚之子西曰父兄親暴骨焉不能收又焚之不可子期曰國亡矣死者若有知也可以歆舊祀豈憚焚之焚之而又戰吳師敗又戰於公壻之谿吳師大敗吳子乃歸

敬王十九年秋秦伯薨孫惠公立冬葬秦哀公 按春秋定公九年 按史記秦本紀哀公立三

十六年卒太子夷公夷公蚤死不得立立夷公子是爲惠公

敬王二十八年冬十月癸卯秦伯薨子悼公立 按春秋哀公三年 按史記秦本紀惠公立十

年卒子悼公立

敬王二十九年春葬秦惠公 按春秋哀公四年

敬王四十三年秦伯薨子厲共公立 按史記秦本紀悼公立十四年卒子厲共公立

元王元年蜀人賂秦 按史記秦本紀厲共公二年蜀人來賂

貞定王八年秦伐大荔 按史記秦本紀厲共公十六年塹河旁以兵二萬伐大荔取其王城

貞定王十三年秦縣頻陽 按史記秦本紀厲共公二十一年初縣頻陽

貞定王十七年晉智開來奔 按史記秦本紀厲共公二十四年晉亂殺智伯分其國與趙韓魏二十五年智開與邑人來奔

貞定王二十五年秦伐義渠虜其王 按史記秦本紀厲共公三十三年伐義渠虜其王

貞定王二十六年秦伯薨子躁公立 按史記秦本紀厲共公三十四年日食厲共公卒子躁公立

貞定王二十八年南鄭叛秦 按史記秦本紀躁公二年南鄭反

考王十一年義渠伐秦 按史記秦本紀躁公十三年義渠來伐至渭南

考王十二年秦伯薨公弟懷公立 按史記秦本紀躁公立十四年卒立其弟懷公

威烈王元年秦伯自殺孫靈公立 按史記秦本紀懷公四年庶長毚與大臣圍懷公懷公自殺懷公太子曰昭子蚤死大臣乃立太子昭子之子是爲靈公

威烈王七年晉城少梁秦擊之 按靈公立於威烈王二十一年則六年應叙於此 按史記秦本紀靈公六年晉城少梁秦擊

之

威烈王十一年秦城籍姑秦伯薨其季父悼子代立

按通鑑前編靈公立止十年爲威烈王十一年史記作十三年便前後不合今依前編叙於此

按史記秦本紀靈公十三年城籍姑靈公卒子獻公不得立立靈公季父悼子是爲簡公

威烈王十七年秦令吏初帶劍塹洛城重泉 按史記秦本紀簡公昭子之弟而懷公子也簡公六

年令吏初帶劍塹洛城重泉

安王二年秦伯薨子惠公立

按通鑑前編簡公止十五年較史記少一年故叙於此又按秦有兩惠公

按史記秦本紀簡公立十六年

卒子惠公立

安王十五年秦取蜀南鄭秦伯薨子出子立 按史記秦本紀惠公十二年子出子生十三年伐蜀

取南鄭惠公卒出子立

安王十七年秦人弑出子而立靈公之子師隰 按史記秦本紀出子二年庶長改迎靈公之子獻

公於河西而立之殺出子及其母沈之淵旁秦以往者數易君君臣乖亂故晉復疆奪秦河西地

安王十八年秦止從死 按史記秦本紀獻公元年止從死

安王十九年秦城櫟陽 按史記秦本紀獻公二年城櫟陽

安王二十一年秦孝公生 按史記周本紀烈王二年周太史儋見秦獻公曰始周與秦國合而別

別五百載復合

注

應劭曰周孝王封伯翳之後爲侯伯與周別五百載至昭王時西周君臣自歸

受罪獻其邑三十六城合也韋昭曰周封秦爲始別謂秦仲也五百歲謂從秦仲至孝公彊大顯
王致伯與之親合也索隱曰按周封非子爲附庸邑之秦號曰秦嬴是始合也乃秦襄公始列爲
諸侯是別之也自秦列爲諸侯至昭王五十二年西周君臣獻邑三十六城以入於秦凡五百一
十六年是合也云五百舉其大數

合十七歲而霸王者出焉

注

徐廣曰從此後十七年而秦昭王立裴駰案韋昭曰武王昭王皆伯

至始皇而王天下索隱曰霸王謂始皇也自周以邑入秦至始皇初立政由太后嫪毐至九年誅
毐正十七年正義曰周始與秦國合者謂周秦俱黃帝之後至非子未別封是合也而別者謂非
子末年周封非子爲附庸邑秦後二十九君至秦孝公二年五伯戴周顯王致文武胙於秦孝公
復與之親是復合也合十七歲而霸王者出謂從秦孝公三年至十九年周顯王致胙於秦孝公

是霸也孝公子惠王稱王是王者出也然五百載者非子生秦侯以下二十八君至孝公二年都合四百八十六年兼非子邑秦之後十四年則成五百載

按秦本紀獻公四年正月庚寅孝公生十一年周太史儋見獻公曰周故與秦國合而別別五百歲復合合七十七歲而霸王出

烈王七年秦桃冬花 按史記秦本紀獻公十六年桃冬花

顯王元年秦雨金櫟陽 按史記秦本紀獻公十八年雨金櫟陽

顯王五年秦晉戰于石門王以黼黻賀勝 按史記秦本紀獻公二十一年與晉戰於石門斬首六

萬天子賀以黼黻

顯王七年秦與魏晉戰于少梁 按史記秦本紀獻公二十三年與魏晉戰於少梁虜其將公孫痤

顯王八年秦伯師隰薨子渠梁立 按史記秦本紀獻公立二十四年卒子孝公立孝公立年已二

十一歲矣孝公元年河山以東疆國六與齊威楚宣魏惠燕悼韓哀趙成侯並淮泗之間小國十餘

楚魏與秦接界魏築長城自鄆濱洛以北有上郡楚自漢中南有巴黔中周室微諸侯力政爭相併

秦僻在雍州不與中國諸侯之會盟夷翟遇之孝公於是布惠振孤寡招戰士明功賞下令國中曰昔我穆公自岐雍之間修德行武東平晉亂以河爲界西霸戎翟廣地千里天子致伯諸侯畢賀而後世開業甚光美會往者厲躁簡公出子之不寧國家內憂未遑外事三晉攻奪我先君河西地諸侯卑秦醜莫大焉獻公卽位鎮撫邊境徙治櫟陽且欲東伐復穆公之故地修穆公之政令寡人思念先君之意常痛於心賓客羣臣有能出奇計強秦者吾且尊官與之分土於是乃出兵東圍陝城西斬戎之獮王衛鞅聞是令下西入秦因景監求見孝公二年天子致胙三年衛鞅說孝公變法修刑內務耕稼外勸戰死之賞罰孝公善之甘龍杜摯等弗然相與爭之卒用鞅法百姓苦之居三年百姓便之乃拜鞅爲左庶長

顯王十四年秦魏會于杜平 按史記秦本紀孝公七年與魏惠王會杜平

顯王十五年秦魏戰于元里 按史記秦本紀孝公八年與魏戰于元里有功

顯王十七年秦圍魏 按史記秦本紀孝公十年衛鞅爲大良造將兵圍魏安邑降之

顯王十九年秦徙都咸陽初開阡陌 按史記秦本紀孝公十二年作爲咸陽築冀闕秦徙都之并